



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“, broj: 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“, broj: 96/13, 89/16 i 5/22) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“, broj: 103/08 i 5/22), izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2021. GODINU POLITIČKE ORGANIZACIJE „ZAJEDNO ZA BOLJI SREBRENİK“

Broj: 03-07-6-384/22  
Sarajevo, 16.02.2024. godine

## SADRŽAJ

MIŠLJENJE REVIZORA.....	3
1. UVOD.....	4
2. PREDSTAVLJANJE POLITIČKE STRANKE.....	4
3. OPIS PREGLEDA I KONTROLE FINANSIJSKOG IZVJEŠTAJA .....	5
Predmet pregleda i kontrole .....	5
Cilj pregleda i kontrole.....	5
Obim pregleda i kontrole.....	5
4. PRETHODNE KONTROLE I REVIZIJE.....	5
5. NALAZI I PREPORUKE.....	5
5.1 NALAZI .....	5
5.2 PREPORUKE.....	6

## MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Političke organizacije „Zajedno za bolji Srebrenik“ za 2021. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

**Pregledom godišnjeg finansijskog izvještaja za 2021. godinu utvrđeno je da je Politička organizacija „Zajedno za bolji Srebrenik“ prekršila odredbe člana 4. stav (1), člana 11. stav (1) i člana 12. stav (1) i (4) Zakona o finansiranju političkih stranaka.**

**Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Političke organizacije „Zajedno za bolji Srebrenik“ za 2021. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja, Politička organizacija „Zajedno za bolji Srebrenik“ se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica ( 3-a )	11.969,00	44,48
3.	Prilozi pravnih lica ( 3-b )	0,00	0,00
4.	Prihodi od imovine ( 3-c )	0,00	0,00
5.	Prihodi od dobiti preduzeća u vlasništvu političke stranke ( 3-d )	0,00	0,00
6.	Prihodi od poklona ( 3-e )	0,00	0,00
7.	Prihodi iz budžeta ( 3-f )	13.936,41	51,80
8.	Prihodi od propagande (3-g)	0,00	0,00
<b>I</b>	<b>Ukupni prihodi (1-8)</b>	<b>25.905,41</b>	<b>96,28</b>
<b>II</b>	<b>Ostali prihodi i drugo</b>	<b>1.000,00</b>	<b>3,72</b>
	<b>Izvori finansiranja (I+II)</b>	<b>26.905,41</b>	<b>100,00</b>

U godišnjem finansijskom izvještaju za 2021. godinu, politička stranka je iskazala rashode u ukupnom iznosu 37.207,41 KM.

## 2. PREDSTAVLJANJE POLITIČKE STRANKE

Naziv političke stranke: Politička organizacija „Zajedno za bolji Srebrenik“. Skraćeni naziv je ZBS.

Politička organizacija „Zajedno za bolji Srebrenik“ registrovana je kod Općinskog suda u Tuzli Rješenjem, broj: 032-0-Reg-20-000318 od 09.03.2020. godine. Rješenjem suda broj: 032-0-Reg-21-001477 od 15.10.2021. godine upisana je promjena lica ovlaštenog za zastupanje i predstavljanje političke stranke.

Sjedište političke stranke je u Srebreniku, ulica Kulina bana bb.

Lice ovlašteno za zastupanje i predstavljanje stranke je Mustafa Šabić, predsjednik stranke.

Ovlašteno lice za finansijske izvještaje za 2021. godinu je Amela Smajlović.

Prema podacima iz godišnjeg finansijskog izvještaja za 2021. godinu, Politička organizacija „Zajedno za bolji Srebrenik“ nema niže nivoe organizovanja.

### 3. OPIS PREGLEDA I KONTROLE FINANSIJSKOG IZVJEŠTAJA

**Predmet pregleda i kontrole** je godišnji finansijski izvještaj Političke organizacije „Zajedno za bolji Srebrenik“ za 2021. godinu.

**Cilj pregleda i kontrole** je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenog zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

**Obim pregleda i kontrole** finansijskih izvještaja Političke organizacije „Zajedno za bolji Srebrenik“ obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

### 4. PRETHODNE KONTROLE I REVIZIJE

Služba za reviziju izvršila je pregled godišnjeg finansijskog izvještaja Političke organizacije „Zajedno za bolji Srebrenik“ za 2020. godinu, nakon čega je izdat izvještaj o pregledu sa nalazima revizije, mišljenjem revizora i preporukama stranci: da svake godine donosi precizan i jasan program utroška sredstava i da finansijska sredstva osigurana za finansiranje političke stranke koristi u skladu sa programom i statutom za ostvarivanje ciljeva političke stranke, da vodi poslovne knjige u skladu sa računovodstvenim propisima, odnosno da vodi pravilne evidencije o svojim rashodima i obavezama, da vodi evidencije o primljenim priložima i da izdaje potvrde o primljenim priložima, da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka, da obrati pažnju na ispravnost i vjerodostojnost knjigovodstvenih isprava i da poštuje odredbe Izbornog zakona BiH i podzakonske akte Centralne izborne komisije BiH, kojim se uređuje postupak otvaranja namjenskog računa i njegovo korišćenje isključivo za finansiranje izborne kampanje.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2021. godinu, utvrđeno je da Politička organizacija „Zajedno za bolji Srebrenik“ nije ispoštovala sve preporuke revizije.

### 5. NALAZI I PREPORUKE

#### 5.1 NALAZI

**a) Politička organizacija „Zajedno za bolji Srebrenik“ je prekršila odredbe člana 4. stav (1) Zakona o finansiranju političkih stranaka<sup>1</sup>.**

(1) Politička stranka je svojim programom utroška sredstava za 2021. godinu predvidjela troškove u iznosu od 19.000,00 KM, a ostvarila ih je u iznosu od 37.207,41 KM.

Uvidom u strukturu planiranih i ostvarenih troškova utvrđeno je da su troškovi u iznosu od 19.043,39 KM ostvareni mimo plana i programa utroška. Politička stranka je planirane

---

<sup>1</sup> Prema odredbama člana 4. stav (1) Zakona o finansiranju političkih stranaka, finansijska sredstva iz člana 3. stav (1) navedenog Zakona stranka može koristiti isključivo za ostvarivanje ciljeva utvrđenih svojim programom i statutom.

troškove prekoračila za iznos od 13.933,51 KM, dok troškove koje je ostvarila u iznosu od 5.109,88 KM, nije predvidjela svojim programom utroška sredstava.

- Programom utroška sredstva stranka je predvidjela troškove bruto plaća u iznosu od 12.000,00 KM, a ostvarila ih je u iznosu od 17.730,96 KM. Trošak zakupnine poslovnog prostora stranka je planirala u iznosu od 3.600,00 KM, a u finansijskom izvještaju ga je iskazala u iznosu od 4.950,00 KM, iako je prema ugovoru u zakupu ovaj trošak iznosio 5.400,00 KM. Troškove reprezentacije, koje je planirala u iznosu od 500,00 KM, stranka je ostvarila u iznosu od 4.002,00 KM. Stranka je planirala troškove reklame i propagande u iznosu od 1.000,00 KM, a ostvarila ih je u iznosu od 3.489,50 KM. Troškove platnog prometa, koje je planirala u iznosu od 100,00 KM, stranka je ostvarila u iznosu od 511,50 KM.
- Politička stranka je ostvarila troškove goriva u iznosu od 3.169,02 KM, troškove toplog obroka u iznosu od 1.253,70 KM, troškove telefona u iznosu od 406,88 KM, troškove usluga u iznosu od 110,28 KM i troškove po osnovu takse u iznosu od 170,00 KM, koje nije predvidjela svojim programom utroška sredstava.

(2) Uvidom u poslovne knjige Političke organizacije „Zajedno za bolji Srebrenik“, utvrđeno je da stranka nema motorna vozila u svom vlasništvu, niti je koristila iznajmljena vozila, a 07.10.2021. godine je pravnom licu Kopex Sarajlić d.o.o. Srebrenik isplatila sredstva za nabavku goriva u vrijednosti od 3.169,00 KM.

Pregledom finansijskog izvještaja političke stranke nisu utvrđena službena putovanja, niti je stranka dostavila druge dokaze na osnovu kojih bi se utvrdilo kada i u koju svrhu je utrošeno gorivo.

S obzirom da je politička stranka sredstva u iznosu od 19.043,39 KM utrošila mimo programa utroška sredstava, te da za troškove goriva u iznosu od 3.169,00 KM nije utvrđeno da su nastali isključivo za ostvarivanje ciljeva utvrđenih programom i statutom stranke, Politička organizacija „Zajedno za bolji Srebrenik“ je prekršila odredbe člana 4. stav (1) Zakona o finansiranju političkih stranaka.

**b) Politička stranka je prekršila je odredbe člana 11. stav (1) i člana 12. stav (1) i (4) Zakona o finansiranju političkih stranaka.**

Pregledom finansijskog izvještaja, poslovnih knjiga i finansijske dokumentacije utvrđeno je da politička stranka nije vodila poslovne knjige u skladu sa računovodstvenim propisima, nije uspostavila evidenciju o novčanim tokovima gotovine, kao i potpunu evidenciju o приходima i rashodima, te godišnji finansijski izvještaj nije popunila na način kako je Centralna izborna komisija BiH propisala Pravilnikom o godišnjim finansijskim izvještajima političkih stranaka (u daljnjem tekstu: Pravilnik), čime je prekršila odredbe člana 11. stav (1) i člana 12. stav (1) i (4) Zakona o finansiranju političkih stranaka.

(1) Politička stranka nije uspostavila evidenciju o blagajničkom poslovanju, niti je u poslovnim knjigama i finansijskom izvještaju evidentirala promet gotovine.

Uvidom u izvode sa transakcijskog računa utvrđeno je da je stranka izvršila polog gotovine na transakcijski račun u iznosu od 2.470,00 KM. Uplate u navedenom iznosu u finansijskom izvještaju je prijavila kao priloge fizičkih lica.

Polog gotovine u iznosu od 470,00 KM stranka je izvršila 11.03.2021. godine, a polog u iznosu od 2.000,00 KM izvršila je 09.08.2021. godine.

U skladu sa računovodstvenim propisima i odredbama člana 11. stav (1) i člana 12. stav (1) Zakona o finansiranju političkih stranaka, Politička organizacija „Zajedno za bolji Srebrenik“

bila je obavezna donacije koje je primila u gotovini evidentirati kroz blagajnu, kao i polog sredstva iz blagajne na transakcijski račun.

U skladu sa odredbama člana 12. stav (4) istog zakona i odredbama člana 12. Pravilnika, stranka je bila obavezna da u finansijskom izvještaju, *na obrascu 2.1.*, iskaže promet sredstva putem blagajne.

- (2) U poslovnim knjigama politička stranka je izvršila pogrešnu klasifikaciju dijela prihoda, koje je u finansijskom izvještaju prijavila u skladu sa odredbama Pravilnika.
- Donacije fizičkih lica, u iznosu od 2.470,00 KM, u poslovnim knjigama su evidentirane kao članarine.
  - Uplate sredstava iz budžeta Općine Srebrenik, u iznosu od 3.096,98 KM i povrat dijela takse koju je politička strankata uplatila za ovjeru za učešće na Lokalnim izborima 2020. godine, u iznosu od 1.000,00 KM, u poslovnim knjigama su evidentirane kao prihod od donacija pravnih lica.
- (3) Politička stranka nije uspostavila potpunu evidenciju o troškovima zakupnine poslovnog prostora. Stranka je kao trošak evidentirala plaćenu zakupninu za period od 11 mjeseci, u iznosu od 4.950,00 KM. Trošak zakupnine za izvještajni period je iznosio 5.400,00 KM. Neprijavlivanjem ukupnog iznosa troškova politička stranka je prekršila odredbe člana 21. i člana 22. Pravilnika.

## 5.2 PREPORUKE

***Preporučuje se Političkoj organizaciji „Zajedno za bolji Srebrenik“ da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:***

- ***da finansijska sredstva osigurana za finansiranje političke stranke koristi u skladu sa programom i statutom za ostvarivanje ciljeva političke stranke,***
- ***da vodi poslovne knjige u skladu sa računovodstvenim propisima, odnosno da vodi potpune i pravilne evidencije o svojim prihodima i rashodima,***
- ***da uspostavi evidenciju o blagajničkom poslovanju i***
- ***da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka.***

## KOMENTAR

Politička stranka se nije očitovala na nalaze revizije navedene u Preliminarnom izvještaju o pregledu godišnjeg finansijskog izvještaja za 2021. godinu.

Šef Odsjeka za revizijske poslove

Sanja Tošović

Šef Službe za reviziju, revizor

Mr.sc. Hasida Gušić